



REPUBLIKA E SHQIPËRISË

ENTI RREGULLATOR I ENERGJISË
BORDI

VENDIM

Nr. 270, datë 28.12.2020

MBI

**LËNIEN NË FUQI TË VENDIMIT TË BORDIT TË ERE-S NR. 94, DATË 08.06.2020
“MBI ÇMIMIN E APLIKUESHËM PËR PRODHUESIT EKZISTUES ME PËRPARËSI
PËR VITIN 2020, NË ZBATIM TË NDRYSHIMEVE TË MIRATUARA ME VKM NR.
396, DATË 13.05.2020”.**

Në mbështetje të nenit 16, të Ligjit Nr. 43/2015 “Për Sektorin e Energjisë Elektrike” i ndryshuar; nenit 10, të Ligjit Nr.7/2017 “Për nxitjen e përdorimit të energjisë nga burimet e rinovueshme”; Vendimit të Këshillit të Ministrave (VKM) Nr.687, datë 22.11.2017 “Për miratimin e metodologjisë së përcaktimit të çmimit vjetor të blerjes së energjisë elektrike që do t’u paguhet prodhuesve ekzistues me përparësi”, i rishikuar me VKM-në nr. 396, datë 13.05.2020 “Për disa ndryshime në Vendimin Nr. 687, datë 22.11.2017, të Këshillit të Ministrave, “Për miratimin e metodologjisë për përcaktimin e çmimit vjetor të blerjes së energjisë elektrike, që do t’u paguhet prodhuesve ekzistues me përparësi”; nenit 15; nenit 21; nenit 22, të “Rregullave të Organizimit, Funksionimit dhe Procedurave të ERE-s”, miratuar me Vendimin e Bordit të Entit Rregullator të Energjisë (ERE) Nr. 96, datë 17.06.2016, bordi i ERE-s në mbledhjen e tij të datës 28.12.2020, mbasi shqyrtoi relacionin nr. 142/13 Prot., datë 24.12.2020 të përgatitur nga Drejtoria e Tarifave dhe Çmimeve, lidhur me “Çmimin vjetor të blerjes së energjisë elektrike që do tu paguhet prodhuesve ekzistues me përparësi për vitin 2020”,

Konstatohet se:

- ERE në bazë të nenit 10, të Ligjit nr. 7/2017 “Për nxitjen e përdorimit të energjisë nga burimet e rinovueshme”, është autoriteti përgjegjës për përcaktimin e çmimit të blerjes së energjisë elektrike nga burimet hidrike, në përputhje me metodologjinë e miratuar nga Këshilli i Ministrave.
- Këshilli i Ministrave me Vendimin nr. 687, datë 22.11.2017, ka miratuar “Metodologjinë e përcaktimit të çmimit vjetor të blerjes së energjisë elektrike që do t’u paguhet prodhuesve ekzistues me përparësi”, i rishikuar me VKM nr. 396, datë 13.05.2020 “Për disa ndryshime në Vendimin nr.687, datë 22.11.2017, të Këshillit të Ministrave, “Për miratimin e metodologjisë për përcaktimin e çmimit vjetor të blerjes së energjisë elektrike, që do t’u paguhet prodhuesve ekzistues me përparësi”.

- Formula për llogaritjen e këtij çmimi, sipas metodologjisë së miratuar me Vendimin e rishikuar të Këshillit të Ministrave nr. 687, datë 22.11.2017, lartpërmendur, është “Çmimi vjetor i blerjes (Lekë/kWh) = Çmimi mesatar vjetor i tregut të ditës në avancë (HUPX/DAM) i energjisë elektrike në profilin bandë (baseload) i vitit përkatës të bursës hungareze (HUPX) të energjisë elektrike në euro cent/kWh X bonusin për promovimin e burimeve të rinovueshme në masën **1.2 X** normën mesatare të këmbimit në Euro/Lekë për vitin e fundit”.
- Nga të dhënat paraprake nga faqja e internetit të Bursës Hungareze të Energjisë (<https://hupx.hu/en/market-data/dam/regular-reports>), është marrë çmimi i deritanishëm mesatar vjetor i tregut të ditës në avancë (HUPX/DAM) të energjisë elektrike në profilin bandë (baseload) për vitin 2020, i cili rezulton në vlerën 37.30 Euro/MWh.
- Sipas “Metodologjisë për përcaktimin e çmimit vjetor të blerjes së energjisë elektrike që do t’u paguhet prodhuesve ekzistues me përparësi”, me normë mesatare të shkëmbimit të vitit të fundit, kuptohet kursi mesatar vjetor i këmbimit euro/lekë, i publikuar nga Banka e Shqipërisë për vitin 2020. Nga të dhënat e deritanishme të publikuara nga Banka e Shqipërisë mbi kursin e këmbimit, rezulton se kursi mesatar i këmbimit për 11 muajt, tashmë të mbyllur të vitit 2020 (Janar - Nëntor), rezulton të jetë 123.79 lekë/euro.
- Nga të dhënat paraprake rezulton se çmimi vjetor i blerjes do të jetë 5.5403 Lekë/kWh.
- Kufijtë minimalë dhe maksimalë të çmimit të blerjes së energjisë elektrike nga prodhuesit ekzistues me përparësi, përcaktohen sipas gërmave “ç” dhe “d” të pikës 2 të VKM-së nr. 687, datë 22.11.2017, ku kufiri minimal është çmimi i miratuar nga ERE për vitin 2016 për këta prodhues (çmim dysHEME) dhe ai maksimal është 15% më i lartë se çmimi i miratuar nga ERE për vitin 2016 për këta prodhues (çmim tavan).
- Në rast se çmimi i blerjes do të rezultojë sipas të dhënave paraprake, për vitin 2021, ky çmim do të jetë sipas kufirit minimal (dysHEME) pra ai i vendosur nga ERE për vitin 2016 prej 7.448 lekë/kWh.
- ERE, sipas metodologjisë së sipërcituar, për sa kohë nuk është mbyllur viti ushtrimor 2020, nuk ka mundësinë e axhustimit/korrigjimit të komponentëve të formulës së paraqitur më sipër.
- Me vendimin nr.7, datë 16.01.2020, Bordi i ERE-s ka miratuar çmimin vjetor të blerjes së energjisë elektrike që do t’u paguhet prodhuesve ekzistues me përparësi të energjisë elektrike për vitin 2020, i cili bazuar në metodologjinë e përcaktimit të çmimit vjetor të blerjes së energjisë elektrike që do t’u paguhet prodhuesve ekzistues me përparësi, të miratuar me VKM nr. 687, datë 22.11.2017, ka rezultuar të jetë 8.0532 Lekë/kWh
- Me Vendimin e bordit të ERE nr. 94, datë 08.06.2020, është vendosur që Çmimi i aplikueshëm për prodhuesit ekzistues me përparësi, të jetë 7.448 lekë/kWh, bazuar në ndryshimet e miratuara nga Këshilli i Ministrave me VKM nr.396, datë 13.5.2020 “Për disa ndryshime në Vendimin nr.687, datë 22.11.2017, të Këshillit të Ministrave, “Për miratimin e metodologjisë për përcaktimin e çmimit vjetor të blerjes së energjisë elektrike, që do t’u paguhet prodhuesve ekzistues me përparësi”.

- Duke qenë se, raporti vjetor i Bursës Hungareze të Energjisë (HUPX) dhe i Bankës së Shqipërisë, publikohet në fillimin e vitit pasardhës, është e nevojshme, lënia në fuqi e Vendimit të bordit të ERE Nr. 94, datë 08.06.2020 “Mbi çmimin e aplikueshëm për prodhuesit ekzistues me përparësi për vitin 2020, në zbatim të ndryshimeve të miratuara me VKM nr. 396, datë 13.05.2020”.

Për gjithë sa më sipër cituar, Bordi i ERE-s,

Vendosi:

1. Lënien në fuqi të Vendimit të bordit të ERE-s nr. 94, datë 08.06.2020 “Mbi çmimin e aplikueshëm për prodhuesit ekzistues me përparësi për vitin 2020, në zbatim të ndryshimeve të miratuara me VKM nr. 396, datë 13.05.2020”, deri në miratimin e një çmimi nga ERE, mbështetur në publikimin e raportit vjetor të Bursës Hungareze të Energjisë (HUPX), si dhe publikimet e Bankës së Shqipërisë për kursin e këmbimit Lekë/EUR.
2. Ngarkohet Drejtoria e Tarifave dhe Çmimeve, të njoftojë palët e interesit për Vendimin e bordit të ERE-s.

Ky vendim hyn në fuqi menjëherë.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga botimi në Fletoren Zyrtare.

Ky vendim botohet në Fletoren Zyrtare.

KRYETARI I ERE

Petrit AHMETI